



1	4
1555	
84	



江南餘載



門 14
1555
84

江南餘載

昭和十九年
四月十日
海峽

四庫全書提要

江南餘載二卷

臣等謹案江南餘載宋史藝文志載之霸史類中
不著撰人名氏馬端臨文獻通考戚光南唐書音
釋竝作江南館載字之訛也陳振孫書錄解題載
是書原序略曰徐鉉始奉詔為江南錄其後王舉
路振陳彭年楊億皆有書大槩六家皆不足以史
稱而龍衮為尤甚熙寧八年得鄭君所述于楚州
其事迹有六家所遺或小異者刪落是正取百九

江南餘載 提要

一

十五段以類相從云云然振孫謂鄭君者莫知何人考鄭文寶有南唐近事二卷作于太平興國二年丁丑又江表志三卷作于大中祥符三年庚戌不在此序所列徐鉉王舉路振陳彭年楊億龍衮六家之內則所稱得于楚州者當卽文寶之書檢此書所錄雜事亦與文寶江表志所載互相出入然則所謂刪落是正實據江表志爲槩本矣今世所行江表志名爲三卷實止二十四頁蓋殘缺掇拾已非完書此書所謂一百九十五段者今雖不

可全見而永樂大典內所引尙夥多有江表志所不載者則江表志雖存而實佚此書雖佚尙有太半之存也宋志載此書二卷書錄解題等諸家書目竝同今采輯其文仍爲二卷以補江表志之闕焉乾隆三十九年十月恭校上

總纂官侍讀臣紀昀

侍讀臣陸錫熊

纂修官編修臣陳昌圖

Table with multiple columns and rows, containing faint text. The text is mostly illegible due to fading and bleed-through from the reverse side of the page.

江南餘載卷上

昇元初烈祖南郊是日司天奏日延三刻

按江南野史作月延三刻

此作日未識孰是

天官書太乙紫宮尙紫故南郊壇墀皆取其色江南用

五色此五帝壇耳禮官失之

江南文臣烈祖時唯稱楊彥伯高弼孫晟李匡明龔溲

蕭儼成幼文賈澤澤及事元宗時江文蔚王仲連李貽

業游簡言湯悅高越越及事後主張義方張緯鍾謨李克明

張易趙宜輔宜輔及事後主陳繼善後主時徐鉉徐鍇韓熙載

王克貞張洎張穎張佖楊澤朱銑喬舜潘文祐湯澥楊滂郭昭度孫舉伍喬孟拱辰馮溢李平張紹賈球顧彝烈祖夜坐南薰閣召見道士王棲霞問何術可致太平棲霞對曰治身治心乃治家國之本今陛下飢嗔飽喜尚不能節何以福及蒼生是時元宗母宋后在簾中聽之歎爲至語賜以金帛棲霞皆不受所居元真觀西北陂澤中有高樹棲霞嘗於其上焚拜奏章烈祖欲爲之建壇棲霞曰建國之初經用不足不宜營此閒務烈祖嘗以中秋夜觀月延賓亭宋齊丘等皆會時御史

大夫李主明面東而坐烈祖戲之曰偏照隴西主明應聲對曰出自東海皆以帝之姓爲諷也

烈祖爲政事僕射時遣人聘越問識羅給事否曰不識亦未聞名越人曰四海知有羅江東爾獨拙於耳乎對曰金榜上無名所以不知也

王慎辭北使時烈祖授以論荅事語百餘條皆機務之要嚴可求覽之請益一事曰若問黑雲長劍多少卽對以來時五十指揮皆在都下柴再用不得赴鎮也慎辭至汴京果首問是時方議南征聞慎辭所對遂罷兵

元宗初馮延魯自水部員外郎爲中書舍人李建勳歎

曰爵祿所以馭士今四郊未靖而延魯以一言稱旨輒

驟遷之若後有立大功者當以何官賞之

按陸游南唐書延魯本傳

亦載此乃江州觀察使杜昌業之言此作李建勳疑誤

元宗嘗語散騎常侍王仲連云自古江北文士不及江

南衆多仲連對曰老子出亳州真源仲尼出兗州曲阜

然則亦不少矣上有愧色

後主末年洪州有婦人萬氏善言禍福遠近謂之萬仙

童江正臣謂時人曰此所謂國將亡聽於神者也未幾

而曹彬渡江

張憲爲監察御史後主旣納周后頗畱心於聲樂憲上

疏言聞有詔以戶部侍郎孟拱宸宅與教坊使袁承進

居止昔高祖欲以舞人爲散騎常侍舉朝非笑今承進

教坊使耳以侍郎宅居之亦近之矣後主批荅賜帛二

十段以旌敢言

開寶中鄂國公從謙使梁以水部員外郎查元方副之

旣至而盧多遜爲館伴使與元方對奕忽謂元方曰江

南畢竟如何元方襍衽對曰江南事天朝二十餘年君

臣禮分極矣復以如何爲問耶多遜爲之愧謝因曰勿謂江南無人

曹翰屠江州噍類無所縱而義門陳氏昆弟七人散處城中事定皆還無所損人以爲孝義之感

建州旣平俘虜人口稍多宰相李建勳請官出錢贖之還本土東閩賴之

徐鉉在徐州治官舍得宿藏錢數百千鉉恥而不取乃復瘞之後鉉家老奴潛往發之聞無所覩

保大中太平府聶氏女年十三歲母爲虎攫去女持刀

跳登虎背連斫其頸虎奮跳不脫遂斫虎死乃還家葬母屍

巖續在江州有奴忤意續策逐之州有柏林多虎奴請殺之輒持梃往擊虎母并數子皆斃焉或言潭有蛟奴解衣下浴蛟來繞之乃急拽登岸烹而食之謂人曰吾勇無敵恨不見用於時耳

徐鉉言銅陵縣尉某懦不能事嗜酒善狂嘗與同官會飲江上忽見賊艘鳴鼓弄兵沿流而下尉乘醉仗劍驅市人而襲之賊皆就縛焉事聞後主嘉之賜以章服除

本縣令此因酒而倖成也

錢氏科斂苛慘民欠升斗必至徒刑湯悅徐鉉嘗使焉云夜半聞聲若響鹿號叫及曉問之乃縣司催科耳其民多蹶行或以篾竹繫腰

徐知訓在宣州聚斂苛暴百姓苦之入覲侍宴伶人戲作綠衣大面若鬼神者傍一人問誰何對曰我宣州土地神也吾主入覲和地皮掘來故得至此

張崇帥廬州人苦其不法因其入覲相謂曰渠伊必不復來矣崇聞之計口徵渠伊錢明年又入覲州人不敢

交語唯道路相目捋鬚為慶而已崇歸又徵捋鬚錢其

在建康伶人戲為死獲譴者云當作水族去陰司遂判

曰焦湖百里一任作獺

姚鳳為內轄使奢僭嘗因病思鹿血羹輒殺北苑長生鹿食之

宋齊丘好交術士得罪之日出入其門者蓋八百人

翰林學士江文蔚侍宴醉而無禮明日拜表謝罪上命賜衣一襲以慰之

元宗宴於別殿宋齊丘已下皆會酒酣出內宮擊樂以

佐歡齊上醉狂手撫內人於上前衆爲之悚慄而上殊不介意盡興而罷明日上於臥帷中索紙筆賜慰齊乃自安

游簡言爲中書侍郎兼領銓選差擇清峭有邵唐考試判不入等上疏言簡言父恭嘗爲鄂帥杜洪記室洪與朱梁結連恭預其謀簡言乃逆臣之子不宜列於清近上怒其誹謗詔決杖配流饒州

馮延巳自元帥府掌書記爲中書侍郎登相位時論少之延魯之敗御史中丞江文蔚上疏請黜延巳上曰相

從二十年賓客故寮獨此人在中有亦何足怪雲龍風虎自古有之且厚於舊人則於斯人亦不得薄矣

楊守忠授武昌節度使宣麻日有禿鷲當正衙立班退乃去未幾而守忠卒

開寶中嘗一夕有禿鷲自西北來成羣翳天自初更至中夜方盡

趙宣輔者中原人仕於江南官省郎頗有時名重陽日與兩浙諸公登高於北山誦杜甫詩以勸酒至明年此會知誰健醉把茱萸仔細看潸然淚下坐客異之未幾

宣輔卒

劉奐自言生時五星雖在吉地然俱隱不見吾必不得為權勢官矣後奐官終起居舍人

姚端年十八狀元及第宰相游簡言以女妻之未幾疾終時人謂之女殺狀元

高越為書生游河朔有牧伯欲妻之為鷓子詩而去詩曰毛骨英靈志性奇摩雲專待整毛衣虞人莫便張羅網未肯平原淺草飛越後為查氏婿

江夢孫夜夢直木生於庭誌朝其妻產男遂名直木幼

聰睿後官至刑部員外郎

張洎云嘗至信州龍虎山值鄉民產子者手執金如意一枚而生此子後為道士不知所之

張洎與錢若水夜直太宗開滋福殿召二人草制詞加李昉左僕射班洎輒前數唐以來十餘名相皆有德望鎮服天下故自右加左今以此待昉非公議所允若水欲進解之洎當帝前以笏拂若水曰陛下熟知矣明日洎進制草有云黃樞重地難委於具臣蒼昊景靈懼懼於大譴太宗竟從洎意昉止右僕射歸班

係宋太宗太平與國時事與江南無涉或因張洎而及之洎仕南唐為清輝殿學士江南平歸宋拜太子中允保大末太弟懇乞就藩燕王宏冀為皇太子以令旨勝

子逼逐昭慶宮僚太弟始自鎮國門上馬就道論者知太子之不永焉

按元宗十六年三月改元交泰立宏冀為太子是年五月即奉周顯德年號明年九月太子宏冀卒

子宏冀卒

徐錯以屯田郎中知制誥久次當遷中書舍人而宰相游簡言每抑之錯遂詣簡言簡言從容曰以君之才地何止舍人但兄弟竝居清要物忌太甚請少緩之使眾稱淹恤進固未晚錯頗怏怏簡言徐出妓佐酒疊唱歌

辭皆錯所製錯乃大喜起謝歸以告兄鉉鉉曰汝乃為數闕歌換中書舍人耶

趙叟者目保大之初至於開寶之季嘗為貢院門子每歲放榜之後或去或留率慶慰之若出於叟手然進士

何蒙贈叟詩曰桂枝輸卻正淒然又被鸞聲聒晝眠唯有趙翁知仔細相傳好語待來年

開寶初舉子齊愈及第綴行至白門忽於馬上大笑不已遂墜馭者扶策良久乃蘇蓋其喜成名如此

趙綺困於場屋將自三山北渡以歸梁京為邏者所得

遂下廷尉從獄中上書曰初至江干覺天網之難漏及歸棘寺知獄吏之可尊後主覽之批其末曰陵雖孤恩漢亦負德乃釋其罪明年綺狀元及第賈覃自言應舉時從禽於鄆杜忽於村店遇大僚避而者竊訪之乃主司楊侍郎涉當時匆遽不暇脫韋袴衣襪褻卷投贄楊公稱歎再三覃自以爲必入等矣及榜出則無名有私於楊公者公曰覃好事業但不脫衣袴故爲累耳

國中有稱冤者多立於御橋下謂之拜橋甚者操長釘攜鉅斧而釘腳又有闖入於殿庭者謂之拜殿後主時進士曾顛謝泌皆南省下第而顛釘腳泌拜殿以稱冤士風於此掃地

陳致堯雍熟於開元禮官太常博士國之大禮皆折衷焉與韓熙載最善家無擔石之儲然妾妓至數百暇奏霓裳羽衣之聲頗以帷簿取譏於時二人左降者數矣熙載詩陳郎不著世儒衫也好嬉游日笑談幸有葛巾與藜杖從呼宮觀老都監其廳中置大鈴大署其旁曰無錢僱僕客至請逸之

高鎬有通天犀帶業毅有歌人皆當時無比者嘗請博
戲之滿座屏氣鎬擲大勝鎬命歌人引滿一曲以辭舊
主歌罷遂攜以歸

柴再用按家樂於後園有從人竊窺於門隙者再用遇
之召至園中使觀焉曰恐隙風傷爾眸子

孫晟初事秦王從榮從榮敗晟漁服亡命至真陽未及
渡追騎奄至晟不顧坐淮岸捫敝衣齧蟲追者捨去乃
渡淮至壽春節度使劉金延與語晟陽瘖不對授館累
日忽謁漢淮南王廟金先使人伏神座下伺之悉聞其

計
所禱乃送詣金陵時烈祖輔吳喜其文辭遂與禪代祕

江南餘載卷上

江南餘載卷下

德明宮本南唐烈祖之舊宅在後苑之北即景陽臺之
故址有太湖石特奇異非數十人不能運致即陳後主
之假山遺址其下有井石欄有銘字跡隱隱猶在

後苑有宮髻石世傳張祜舊物上有杜紫微杭州刻字
相寄之跡祐以其形若宮髻故名之云祐平生癖好太
湖石故三吳牧伯多以爲贈焉

元宗罷朝多御延英殿聽公卿奏事因即其處爲閣甚
壯有司請置額名上以生月在孟春御題爲千春閣

朝元門三橋龍躍鎮國天津二曲尺跨水覆屋舊制文武大臣帶平章事者許乘馬行過鎮國天津二橋百官皆就二曲尺下馬

元宗遷都洪州過蕪湖江口永壽禪院親射偃蓋松東南枝遂枯死至今御箭仍在

讓皇在泰州賦詩曰江南江北舊家鄉二十年前夢一場吳苑宮闈今冷落廣陵臺榭亦荒涼煙凝遠岫愁千疊雨滴孤舟淚萬行兄弟四人三百口不堪回首細思量

烈祖爲尙書左僕射年甫三十自以居揖讓之際非老舊無以臨衆乃服白髮藥一夕皓然

讓皇在泰州數年每有嗣息及五歲必有中使至賜品官章服然卽日告卒

蘇洪規築揚州城古塚中得石銘其文曰日爲箭兮月爲弓射四時兮何曾窮但見天將明月在不覺人隨流水空南山石兮高穹窿夫人墓兮在其中猿啼鳥叫煙濛濛千年萬年松柏風

進士舒雅嘗從鄭元素學元素爲雅言溫韜亂時元素

隨之多發關中陵墓嘗入昭陵見太宗散髮以玉架衛
之兩廂皆置石榻有金匣五藏鍾王墨跡蘭亭亦在其
中嗣是散落人閒不知歸於何所

宋齊丘出鎮洪州詔賜錦袍烈祖親為衣之李

建勳贈

詩有一人看上馬雙節引還鄉之句時論榮之馮延巳

李建勳拜相張義方獻詩曰兩處沙堤同日築其如啓

沃藉良謀民間有病誰開口府下無人只點頭

莊布訪皮日休不遇因以書疏其短失世頗傳

休子光鄴為吳越王使江南輒問江表何人

高或對曰近世無聞之所此贈皮日休書家藏一本光

鄴大慚

保大五年元日大雪詔太弟以下會宴登樓賦詩遣中

使就李建勳第示之建勳與中書舍人徐鉉勤政殿學

士張義方皆和進呈復召建勳義方鉉入夜艾乃散鉉

為之敘太弟使名上畫為圖障

按元宗元日大雪登樓詩云珠簾高捲莫輕遮

往往相逢隔歲華春氣昨宵飄律管東風今日放梅花

素姿好把芳姿掩落勢還同舞勢斜坐有賓朋尊有酒

可憐清味屬儂家

李夷鄴者前唐諸孫嗜酒不羈保大初以宗室賢才拜

正卿累經左降逾年輒復舊官元宗上已開宴夷鄴不在召中乃獻詩曰偶憶昔年逢土已輕舟柳岸宴羣臣人間蹇薄時時歎天上風光日日新玉帛已來諸國瑞瑤池固有萬年春賦詩飲酒平生事賜斷金門願再親上賜御札曰我家有此狂宗正快哉

徐鉉爲人忠厚不以位貌驕人在海州時蒯亮爲錄事參軍鉉與往還如僚友亮授代鉉以詩送之曰昔時聞有蒯先生二十年來道不行抵掌曾談天下事折腰猶忤俗人情老還上國風光少貧裏歸裝結束輕遷客臨

流倍惆悵晚風黃葉滿孤城有印粲者獻詩曰不將才業暫時誇人仰聲名遍海涯月滿朝衣聽禁漏更闌分直掃宮花諫書未上先焚橐御筆曾傳立草麻見說下朝無一事小池栽葦學僧家

徐鉉撰義門陳氏書堂記有男女長幼以屬會之辭旣已授之又密令寫碑人自於未添一食字或問其故鉉曰非食無以義聚欲以此一字爲陳氏子孫之誡耳李建勳致仕自稱鍾山公詔授司徒不起學士湯悅致狀賀之建勳以詩荅曰司空猶不作那敢作司徒幸有

山公號如何不見呼

李建勳罷相元宗於西苑天全閣別置廳院待之命右僕射孫晟同寓直焉建勳進詩曰御苑賜房令待詔此身殊勝到蓬瀛禁中仙樂無時過階下常人不敢行疊穎弄芳秋氣落叢柯聳翠露華清天廚送食何功享空詠康哉贊盛明

張洎潘祐俱爲忘形之交其後俱爲中書舍人乃相持祐之死也洎蓋有力

韓熙載南遷上表略曰無橫草之功可補於國有滔天

之過目累其身老妻伏枕以呻吟稚子環牀而坐泣三千里路送孤客以何之一葉扁舟乘病身而前去上憫之遂畱不遣

開寶中張昭通判建州奉敕至武夷山清秋雨歇聞雲中仙樂自辰及酉不絕大抵多竹聲昭故曉音律審其曲有人間迎仙客云

開寶末長老法倫夢金陵兵火四起有書生朗吟曰東上波流西上船桃源未必有真仙干戈滿目家何在寂寞空山聞杜鵑

秘書郎刁侃文安郡公

按文安郡公徐游知誨子也初名景游避元宗諱去景字

愛婿姻連戚里第宅蕭灑一日侃弟妹於庭下忽見兩人浴古槐而上以瓦擊中之應手墮地四肢雖具長纒二寸許狀如世所畫夜又然瘞之是夕侃家堂室之間鬼怪無數或見大手或呈巨顙如是者三夕餘設醮謝之猶不已也是時周維簡講易於侃別院獨無變怪於是盡徙焉維簡方說泰卦倦而假寐恍惚中見冠裳者數百人前揖自言昔自南岳來寄居古槐歲月已久今刁侃弟妹皆無道橫害二子悲歎不堪適當索償既匿

先生之舍且先生方講聖經非某措手之時願聞談義容解脫之矣維簡驚覺為之齋沐旬日終篇鬼怪乃絕安陸人毛生善食毒蛇以酒吞之嘗至洪州以弄蛇取食積十餘年有賣薪者自鄱陽來夜夢老父云為我寄一蛇與毛生可乎賣薪者許之至洪州運薪將盡有蛇蟠船中棖觸不動因悟前夢攜以訪毛生毛生撥之忽嚙其乳大叫仆地食頃已爛亦不知蛇所在

金毅為御史判官逮御史臺主簿判覆刑司歲餘染疫言見三囚荷校自陳罪不至死而君誤宣於法今得請

於上帝君本猶有三十餘年在世三人各折君十年宜知之明日毅卒

祕書監歐陽遇判大理寺日奏當澤陽縣令余紹卿死罪時論冤之既而紹卿常見形相隨遇惡之乃請告至廬山九天使者廟下設黃籙齋醮以淨陰冥然紹卿亦至席閒其夕遇爲鬼神推擲殿下而斃

宋齊丘至青陽初命穴牆給食俄又絕之餒者數日中使謂齊丘曰俟令公捐館方俱食耳以絮塞其口遂卒卒時有黑氣起直貫九華山元宗暮年禁中往往見齊

丘陳覺李徵古如生時禳之不去甚惡之因議百幸太子宏冀病亦數見太弟爲祟云

楊懷義爲侍衛時方在圍中鎗鼎忽自廚中成行而出列於庭下又半夜戈戟忽有聲火出炎炎者數夕俄而敗下獄

賈誥善望氣罷節鎮歸闕時艤舟江上忽見晚天氣如鸞鳳須臾羽翼零落色變爲蒼誥歎曰此爲我耳自是慘然不樂及召對果以忤旨謫授諸衛將軍

殷文圭爲舉子時嘗經大澤中遇大雨震電僕乘皆踣

文圭安詳如不聞及至逆旅從者怪之試視文圭兩耳皆有泥封塞云後爲翰林學士

魏羽肄業於白鹿洞臨赴舉大醉臥百花峯下稍醒忽有鬼物十數輩環侍其側羽驚問之對曰以公貴人故奉守耳其後羽以昭文館校書起家過江至三司使工部侍郎

開寶中吉州城望有人面方三尺許睨目多鬚自旦至酉乃沒

開寶中宋師至金陵詔鄭彥華以水軍迎戰於慈湖峽

是日重霧不解八月十一日白虹貫日咫尺不分

范陽盧文進自云嘗偕契丹入絕塞射獵以給軍食一日晝晦星象燦然衆皆懼捕得番人曰吾國以爲常也頃之景復開朗

江州有田婦採拾於野忽爲虎攫而踞之婦向天大呼虎舉其掌婦視其中有刺因爲拔之虎乃捨婦而去

元宗時海國進象數頭皆能拜舞山呼

靈芝圖言千歲蝙蝠色如雪白如硃集則倒懸以其腦重故也服此可以長生後主時有人獲之進上上方事

佛禁殺戮而不用後不知所之

唐未有御廚庖人隨中使至江表聞崔眉誅北司遂漂
浮不歸畱事吳至烈祖受禪御膳宴飲皆賴之有中朝
之遺風其食味有鷺鷥餅天喜餅駝蹄餈雲霧餅按陸唐書雜藝列傳所載尚有春分餈蜜雲餅鑊糟炙龍璠餈紅頭簽五色餈餛子母饅頭而無雲霧餅附載於此
後主篤信佛法於宮中建永慕宮又於苑中建靜德僧
寺鍾山亦建精舍御筆題為報慈道場日供千僧所費
皆二宮玩用

鄭元素者溫韜之甥隱居廬山青牛谷不交人事元宗

召至都下館於徐鉉家及卒鉉令元素鄉人龍敏瘞其

屍於石子崗臨穴之際有七鶴盤旋空中敏輒禱之一

一下拂棺蓋

許堅往來句曲廬阜之間草裝布囊或臥於野或和衣

浴澗中蕭然不接人事獨笑獨吟而已其詩有云祇應

天上路不為下方開道既學不得仙從何處來又題簡

寂觀云常恨真風千載隱洞天還得恣游遨松楸古跡

一壇靜鸞鶴不來青漢高茅氏井寒丹亦化元宗碑斷

夢會勞分明有箇長生路不向紅塵白二毛堅詩頗多

江有餘載下

九知不足齋叢書

其語意類此景德中無疾卒於金陵歲餘忽於洪州謁見兵部員外郎陳靖靖至建康言之王化基發其墓已尸解去

魏進忠不知何許人徐玠稱其有飛鍊之術上聞於烈祖俄擢爲延英殿使寵錫甚厚詔以延英殿爲飛鍊所進忠造宅於皇城之東廣致妓樂託結貴近出入導從擬於王者或贈人金帛動盈千百士人多附之經數年竟無狀遂配東海縣

周繼諸者鄱陽人詣闕上書累官至郎省告免歸鄉與名僧道士爲雲泉之交元宗召之授以美官堅辭不就上嘉之賜粟帛又賜金釭一柄敕曰是朕苑中自種藥者今以賜卿表卿高尚之節

蜀人陳曙者王氏末年避地淮南隱於蘄州山中鄉人祀神曙不召亦必至醉飽而後去雖百神祠曙能徧往也其所居屋一間道書數卷而已與蛇虎雜處而泰然無所忌元宗遣中書舍人高越齋束帛徵之三往不應後移居鄆州不知所終越贈曙以詩曙次韻答之云罷脩儒業學脩真養拙藏愚四十春到老不疎林裏鹿平

生未識日邊人
澗花發處千堆錦
巖雪鋪時萬樹銀
多謝朝賢遠相問
未聞雞得鳳爲鄰

僧謙明嗜酒好爲詩
獨居一室每日鐺中煮肉數斤
醉酒一壺不俟爛熟
旋割旋飲以此爲常
嘗中秋詠月云
迢迢東海出
漸漸入雲衢
此夜一輪滿
清光何處無
乘興遂子夜鳴鐘
烈祖聞之不罪也
召問其所求對曰
唯願鵝生四腳
蟹著兩裙

江南餘載卷下

五國故事

五國故事

五國故事訂誤

上卷

第二頁前一行 黑雲都下脫累以軍功定淮南地唐拜行密為淮南節度使其十八字

第四頁前一行 以見楊氏下脫楊氏二字

第五頁後四行 吾兄為政暴急下脫主字

第六頁前二行 日我家郎下脫君字

第九頁前六行 初煜下脫以字

後二行 後蜀先主下脫王字又建字下脫字光國三字

後三行 有神人謂下脫之字

五國故事訂誤

一知不足齋叢書

第八頁前一行市人下

脫日字

下卷

第六頁後四行

因字下脫立字

後八行

自光山下脫起兵二字

右據盧學士抱經堂校本勘定

五國故事卷上

劍光閣鈔

開雕

偽吳楊氏

先主行密

唐淮南節度使中書令終吳王渭僭號乃追冊為武皇帝廟號太祖

渥

不僭號渭稱吳乃追諡為景皇帝

渭

僭稱大吳列諡曰宣皇帝

溥

偽號為讓皇帝乃李氏傳位之後冊為高上思元崇古讓皇帝亦非吳也

偽唐李氏

先主

昇

偽諡為孝高皇帝廟號烈祖

嗣主

景

偽諡至道文宣孝皇帝廟號太宗

五國故事上

一知不足齋叢書



後主

煜入朝封違命侯旋封隴西郡公殂追封吳王

前蜀王氏

先主

建偽諡神武孝德明惠皇帝廟號太祖

後主

衍歸降唐明宗追封順聖公

後蜀孟氏

先主知祥

偽諡文皇帝廟號高祖

後主

昶歸朝封秦國公薨追封楚王諡曰恭孝

偽吳先主吳王行密廬州合肥人力舉三百斤微時居常獨處必見黑衣人侍其側後既有衆遂令部兵悉以

黑繒幕其首號曰黑雲都行密之妻兄朱延壽始爲行密稱薦旋至壽州節帥而延壽潛以宗姓通於梁祖將規淮南行密乃謀去之且慮召之不至遂詐爲目疾凡三年其妻且夕視其動靜以爲信至於私於隸僕悉避餘人唯不避行密密一日謂其妻曰吾目疾不瘳矣諸見且不克省軍府之事當屬於舅汝宜召之其妻自以書召延壽既至行密處正廳潛兵以見之俄而開目曰數年不見舅今且果相覩延壽惶駭遂叱勇士執而殺之仍廢其妻焉行密雄豪而頗有度量蘇州刺史成及

及浙之八都也後為彰義軍節度使兼侍中皆王命也為部所叛執送行密密以

其厚重伉直頗重之舍於正廳之後房室間亦有劍甲之類而行密盛暑中日以單衣而至與及飲膳了無疑忌之色及又嘗抵行密內室見行密方起盥漱而右手擎一沙羅可百餘兩水滿其中而洗項則力舉三百斤不謬矣渥密長子既襲父位遂舉兵克江西虜鍾氏而歸先是謠言云楊老抽嫩鬢堪作打鍾槌此下有聲猶脫誤未率不堪嗣父事乃同謀害之而立其弟渭槌折之言蓋冥符也初溫之與顯同謀害渥實戊辰歲夏六月也

議既定其夕將暝顯已先入而溫使告顯曰今非番直不欲俱入慮其謀漏泄請顯獨訖其事然後見報顯諾之其夕既殺渥遂召溫溫乃詣城門大哭曰張顯弑逆殺害老令公郎君矣軍眾皆為之哭其夕遂殺顯立楊渭渭以溫兼左右軍政焉渭既為主至己卯歲建偽號先是梁受唐禪楊氏遂不復朝貢因稱天祐十六年為武義元年間一年渭卒乃以其弟丹陽王溥襲位偽諡渭為宣皇帝焉朱瑾者楊氏之名將也徐溫既出鎮潤州以其子知訓知廣陵政事謂之政事僕射瑾與知訓

有通家之好嘗使知客詣知訓之第知訓纔二十餘頗以聲色爲務而潛與知客通取其所佩綃巾知客懼歸以告瑾瑾頗銜之一日楊氏會鞠於廣場知訓與瑾立馬觀之馬首相接瑾因揖知訓曰邪日綃巾希以見還知訓知事泄且慮瑾爲變翌日遂諷楊氏出瑾爲歷陽瑾知爲知訓所排將整行計密有圖知訓之意及知訓詣瑾告别時盛暑瑾以水徧灑廳事皆汪洋不可駐足乃直抵其內瑾大設宴以待之出愛姬姚氏薦酒乃獻名馬瑾愛其馬夏以羅幃冬以錦帳覆之知訓納拜於瑾瑾以手板擊殺

之截其首提八以見楊氏聞變乃閉諸門且曰伊自有阿爺處置是事瑾以楊氏不見納遂踰城而出因墮城下折足乃自剄吳人暴其尸於市蟲蛆不犯卽日其事聞於昇州知誥誥謀於宋齊丘丘曰請明公卽今渡江定其事仍馳聞令公令公卽溫也時在潤州則政事之任歸公矣不然令公當以諸子八代明公無望矣知誥立從之溫聞知誥已入遂因而許之知誥旣代知訓以厚重清儉鎮撫時俗頗革知訓之道矣徐溫嘗入覲知誥密聞於楊氏曰溫雖臣之父忠孝有素而節鎮八覲無以兵仗

自從之例請以臣父爲始乃命溫悉去兵仗而入既消
知誥之第侍奉彌謹初更睡覺見有侍於牀前者問之
曰知誥溫因遣其休息知誥不退及再寤又見之乃曰
汝自有政事不當如此以廢公家之務知誥乃退及溫
中夕而興又見一女子侍立問之曰知誥新婦亦勞而
遣之他日溫謂諸子曰事在二哥矣汝輩當善事之溫
好被白袍知誥每遇溫生日必獻一日既獻而座客有
諂溫者曰白袍不如黃袍好知誥遂斥之而謂溫曰令
公忠孝之德朝野所仰一旦惑諂佞之說聞於中外無

乃玷烜赫之名願令公無聽其邪言溫亦然之知誥慮
溫急於取國而已非其嫡不得以嗣故以是言之然內
謀其家外謀其國勞心役慮數倍於曹馬矣宋齊丘既
在知誥賓席溫甚疑之有石頭大師者溫頗加待遇而
齊丘亦寓於石頭之精舍一日溫謂石頭曰宋措大在
吾兒子門下甚非純信之士慮其近習不以忠孝爲務
師其察之石頭乃伺其所爲而齊丘已察其意自是晨
出暮返歸必大醉或以花間柳曲謳歌之辭以示之石
頭乃謂溫曰宋措大蓋狂漢耳不足爲慮溫由是不介

意知誥之兄知詢以徐溫既卒乃代爲金陵節制爲政
暴急仍與知誥爭權知誥患之乃給以楊氏將申輔相
之命使知詢入朝知詢信之亟請入覲及至江都會於
知誥之第且不得見知詢詰之知誥曰吾兄爲政暴急
上知之將加譴責 待罪於私第尙恐未暇況欲見乎
知詢由是始悔入覲尋處環衛之列焉行密四子渥渭
悉襲僞位唯濛爲溥之長濛第十六溥第十七而長於弓馬徐氏
忌之故不立而終構其罪自臨川王廢爲歷陽公幽於
歷陽濛聞將有禪讓遂殺監守者與其下二馳赴廬江

詣周本

本時爲廬江節帥
即濛之婦翁也

本之子祚閉門不納本聞之

曰我家郎何以不見祚不荅因執濛官之於外濛因殺
數人而卒徐氏使溺其屍於江中知誥在相府嘗一日
不悅其夫人問之知誥乃告曰夜夢不吉以是爲憂耳
夫人曰夢無吉凶在人諉之耳有善諉者請召之庶解
憂慮知誥因出廳事俄見周宗於庭下乃謂曰我昨夢
過順天門俄而仆地非凶邪宗亟拜賀曰此明公宜令
人策立也知誥大悅及宗入內室與夫人同席而飲後
使宗知監鐵職務家遂大富官至侍中焉徐氏將移楊

五國古事
氏之祚乃以昇州爲大吳西都揚州爲東都聲言將遷
楊氏於江南改白沙爲迎鑾鎮俄而逼禪稱楊氏欲入
道乃營室於茅山遷溥居之冊曰受禪老臣臣知誥謹
上尊號曰高尚思元崇古讓皇帝溥既渡江賦詩略曰
煙凝楚岫愁千點雨滴吳江淚萬行兄弟四人三百口
不堪端坐細思量及將遇弑方誦佛書於樓上使者前
趨溥以香鑪擲之俄而見害李氏以海陵爲泰州置永
寧宮於州之門右遷其族以處使親信褚仁規爲刺史
以專防護後周世宗渡淮李氏急使人赴海陵盡害之

知誥自以取國艱難乃志勤儉金陵雖升都邑但以舊
衙署爲之唯加鴟尾欄檻而已其餘女伎音樂園苑器
玩之屬一無增加故宋齊丘爲其挽辭曰宮砌無新樹
宮衣無組繡宮樂盡塵埃皆其實也

知誥卽位改姓李
氏更名昇稱大唐

今書其舊名
欲易曉也

宋齊丘既以徐氏啓慶開國之宴遂乘醉

大詬於筵上百僚悚然知誥隱忍而已吁開國祚首啓
宴樂台臣爲之酹酒晉史所謂我使庾純罵爾於席上
爾又不改此之類也由是言之蓋非國祚延遠之兆耳
知誥疾革以其子景達類己欲立之時景達爲成王居

守東都

東都場州也

知誥乃密為書以召景達使入將付後

事醫官吳庭紹與知誥診候知其將終且召景達之事

遂密告李景使人追回其書

時書已出秦淮門而追及之

俄而知誥

殂景乃即位其後吳庭紹遷內職入罕知其由

或云知誥在位

嘗晝寢夢黃龍繞其殿檻使人視之報曰齊王抱小殿

之後為吳王太子名景通即位改曰璟後避周廟諱更名景

日非也徐溫既與張顯將謀弑溫而先擇其嗣主而溫

乃定之非季氏事也景在位嘗構一小殿謂之龜頭居

常處之以視事人有偵其所在必問曰大家何在在龜

頭裏及後有內附之事人始悟焉景即位改元保大壬

子癸丑閒有狂人遍揚州市詬罵市人待顯德三年總

殺之又曰不得韓白二人殺之無噍類時朝廷廣順年

也人皆莫測顯德之號俄而周太祖南郊改元顯德世

宗襲位因仍其號至三年丙辰王師遂入淮南時韓侍

衛令坤白太師重遇並為戎帥王師既入將屠其城而

二公戢兵淮人得過江而南者九眾悉如狂人之言周

師未南征而淮南市井小兒普唱曰檀來也眾頗怪之

及揚州建春門有鼉

鼉本陀音而俗謂之檀出於水次眾以為應

矣未幾王師入先鋒騎兵皆唱蕃歌其首句曰檀來也
方明其兆偽侍中周宗既阜於家財而販易每自淮上
通商以市中國羊馬及世宗將謀渡淮乃使軍中人蒙
一羊皮人執一馬偽為商旅以渡浮橋而守繼以兵用
遂入臨淮雖金陵弛於邊防亦周宗務於貪贖破國之
釁有若此者為臣之咎不亦深乎煜景之次子本名從
嘉嗣偽位乃更今名有辭藻善筆札頗亦有惠性而尚
奢侈嘗於宮中以銷金紅羅幕其壁以白銀釘瑇瑁而
押之又以綠鈿刷隔眼糊以紅羅種梅花於其外又於

花間設綵畫小木亭子纔容二座煜與愛姬周氏對酌

於其中如是數處

每七夕延巧必命紅白羅百匹以為
月宮天河之狀一夕而罷乃散之

煜善音律造念家山及振金鈴曲破言者取要而言之

家山破金鈴破又建康染肆之榜多題曰天水碧尋而

皇家蕩平之悉前兆也

天水碧因煜之內人染碧夕露
於中庭為露所染其色特好遂

名初煜建隆二年七月二十九日襲偽位於金陵因登

樓建金雞以肆赦太祖聞之大怒因問其進奏使陸昭

符符素辯給上頗憐之是日對曰此非金雞乃怪鳥耳

上大笑因而不問昭符之對雖涉滑稽而能取悅上情

免其君僭上之責亦其忠也

偽蜀先主建許州舞陽人也世爲餅師嘗葬其父乃發

地數尺而瘞

鄉人卜葬皆以卽日求地開塋故也

其棺躍出有神人謂曰

此天子之地女小民何容卜葬建不聽但瘞之棺復躍

出如是者三乃得葬其後爲忠武軍部將討尙君長於

山東力戰馬斃剖之得蛇於馬腹由是自負建初以唐

朝之命析黎雅邛蜀四州爲永平軍節度旋領兩川封

蜀王及梁太祖受禪乃僭大號梁祖以其俱爲唐朝勳

舊不敢傲之又以岐隴不附欲假建爲腹背之患乃與

之通和使介交質情好尤篤建初復書於梁祖曰七十

州自可指揮八千里罕因開拓又曰俱非恃強逼禪皆

以行道濟時云建在位有漢州人郭迴耕得古銅牌以

獻有王建王元膺以下六十餘字建乃改其長子名元

膺以應其事識者曰膺者胸也胸者凶也皆非吉兆俄

而元膺以延巧之夕將請建宴於東宮遂謀作亂事發

元膺伏誅乃立其少子鄭王衍是爲後主建在僞位十

有二年凡五改元曰武成曰永平曰通正曰天漢曰光

天仍以其僞號易錢文而鑄之

今惡錢中尙有

建急於督責雖

倉廩充溢延博案而鑄之至倉廩充溢十九字據別本增入而聚斂不已蜀中

每春三月為蠶市至時貨易畢集闐闐填委蜀人稱其繁盛而建嘗登樓望之見其貨桑栽者不一乃顧左右曰桑栽甚多儻稅之必獲厚利由是言出於外民懼盡伐其桑柘焉建末年苦於痢疾疼楚尤劇但坐錦囊而疾中顧左右曰我見百姓無數列於牀前詬我曰重賦厚斂以致我傷害而死今已得訴於帝矣建曰我實不知外閒如此今如之何未幾而殂衍即偽位荒淫酒色出入無度嘗以繒絲數萬段結為絲樓山上立宮殿亭

閣一如居常棟宇之制衍宴樂其中或踰旬不下又別立一絲亭於山前列以金銀綺釜之屬取御厨食料烹燂於其間衍凭絲樓以視之謂之當而廚絲山之前復穿一渠以通其宮中衍乘醉夜下絲山即泛小龍舟於渠中使宮人乘短畫船倒執蠟炬千餘條逆照水面以迎其船歌樂之聲沸於渠上及抵宮中復酣宴至曉絲棲山遇風雨霜雪所損乃重易之無所愛惜又好擊鞠常引二錦障以翼之往往至於街市衍為步障所蔽而亦不知乃齊東昏高障之類也好戴大裁帽蓋欲混已

廷博案此處似有脫誤據蜀檮云衍衍而人以為泥首衍包羞之兆耳衍好燒香沈檀蘭麝之類芬馥氤氳晝夜不息既而厭之乃取阜角燒之其奢縱皆此類也初建立衍為嗣鑄銅鐘於佛寺虛懸之其聲洪遠建乃謂其下曰吾立此鐘為立太子故也今聲洪遠是必東宮將來之慶俄而纔及八日其鐘頽地龍首摧落建聞之不懼衍襲偽位果八年而亾國衍之末年率其母后等同幸青城至成都山上清宮隨駕宮人皆衣畫雲霞道服衍自製甘州曲辭親與宮人唱之曰畫羅裙能結束稱

腰身柳眉桃臉不勝春薄媚足精神可惜許淪落在風塵宮人皆應聲而和之衍之本意以神仙而在凡塵耳後衍降中原宮妓多淪落人間始驗其語初莊宗即位與通好命客省使李巖使於蜀衍建上清道宮塑元元及唐朝列帝宮中偽尊王子晉為聖祖至道玉宸皇帝塑其形仍塑建與衍侍立其側召巖以觀之衍因備法駕行朝謁獻享之禮而亦享唐之列聖蜀人以為朝唐之列聖蓋歸中原之兆也謁享之日蜀中士女夾道觀之珠翠簾幕為之照耀及巖回乃言可取之狀嘉王宗

壽者王氏宗室中最為賢王嘗因重陽衍召宗室及近
臣宴於宣華苑自且至於繼火沈湎尤甚宗壽因以社
稷之事言之涕淚交落而佞臣潘在迎顧在珣廷博案
蜀博枕
而罷及蜀亾宗壽至洛表請以公禮葬衍朝廷因追封
衍為順正公出葬之日宗壽步從之尋為淄州刺史復
為青州節度使以壽終蜀之王公亾國之後多所淪喪
而宗壽獨保其終以見上天福善之道後唐既平蜀土
乃以太原節度使孟知祥走馬入蜀以鎮撫之及明宗

時安重誨用事知祥乃絕朝貢尋以長興五年遂僭大
號初王氏在蜀建初宮殿皆紀大匠孟德名氏於梁俄
而終為孟氏所處知祥僭號纔七月而終其子昶嗣偽
位昶尚年少乃與其母后同宮數年餘遂遷新宮而居
以其宮宇稍廣乃選民間女子有殊色者充之及有司
引至後苑昶親選擇佳者亦賜諸王餘則縱去而民間
懼其搜選皆立求媒伐而嫁之謂之驚婚焉昶之幼年
有日者周元豹視之謂知祥曰此兒骨法非常宜愛之
知祥不聽後又遣元豹同昶於戲劇之處熟視之既而

告曰此四十年偏霸之主非等閒也知祥始喜由是特加愛念昶之母后即後唐積慶公主之從車也嘗在并門累從征伐備歷艱難由是頗務慈儉常戒昶以固福壽為懷而昶亦能稟之寢處惟紫羅帳紫碧綾帷褥而已無加錦繡之飾至於盥漱之具亦但用銀兼以黑漆木器耳每決死刑多所矜減而儉止一身仁唯容惡乃匹夫之小節耳然仁道至大元鑒孔昭及歸皇朝終訖天命遠視李氏近觀王衍禍福之道蓋相方焉蜀之末年百官競執長鞭自馬至地婦人競戴高冠子皆謂之

朝天又製新曲名之曰萬里朝天意謂萬里皆朝於已及歸降之後崎嶇川陸至於京師乃萬里朝天之驗矣昶性畏懦在位唯每年春一拜知祥之陵及十一月誕日偽號明慶節幸佛寺燒香而已他無所適每出則乘步輦垂以重簾環結珠香囊垂於四角香間數里人亦不能見其面昶出外則以其輦輦崇飾奢麗居常之內惟銅裝朱漆小輦而已故三十年不南郊不放燈率由懼非常也昶後體重遂不乘馬內殿惟飼一打球馬而久不按習亦不堪乘跨其餘名馬多屬之親王近臣耳

五國故事卷上

Blank columns for the upper volume text.

五國故事卷下

偽漢彭城氏

先主

嚴

偽諡天皇大帝廟號高祖

第二主

玠

偽諡

第三主

偽諡文武光聖明孝皇帝廟號中宗

後主

銀

入朝封恩放侯祖封南越王

偽閩王氏

忠懿王

審知

不替號朝廷封閩王終諡忠懿王

延翰

偽稱閩不替帝號踰年而終無聞偽號

五國故事下

延鈞

偽稱大閩皇帝偽號太宗

昶

鈞子襲偽號偽諡康宗

延義

襲偽號為朱氏所滅無間偽號

延政

建州僭號大商皇帝尋為淮人所虜偽封光山王

宗屬王延稟

王延彬

附

朱文進

卓儼明

李孺贊

婁從劾

張漢思

陳洪進

俱附

為漢先主名巖後名龔

後又名龔龔之字曰儼本無此字龔欲自大乃以龍天合成其

字以其不典故不書

其先上蔡人徙閩之仙游復遷番禺因家焉

父謙為賀水鎮將既卒以其子隱嗣隱即巖之兄也先

時唐末天下藩鎮不受代而薛王知柔以石門扈蹕功

授唐廣帥丞相齊公徐彥若復代知柔隱皆迎納朝論

嘉之尋自為廣帥隱卒巖代其任初巖之正母韋氏頗

妒聞其生乃仗劍於中門使其兒至將殺之家人不

敢匿乃持去既見之後劍輒墜地乃跪而抱之曰此我

家之寶遂取為己子梁朝命冊南平王以中原多事乃

僭號改元乾亨封其子十有八人為王九年八月白虹

入其偽三清殿中頗憂畏中外震懼會有詞臣王宏欲

說巖乃以白虹為白龍見上賦以賀之巖大悅乃改元

白龍更名龔又改爲龔龔見前注謙初爲封州刺史而其母
殺氏生巖有日者視之謂謙曰公之諸子唯少者貴耳
又巖性嚴酷果於殺戮每視事則垂簾於便殿使有司
引罪人於殿下設其非法之具而屠膾之故有湯鑊鐵
牀之獄又有投湯鑊之後更加日曝沃以鹽醋肌體腐
爛尙能行立久之乃死其餘則鎚鋸互作血肉交飛腥
穢之氣冤痛之聲充沸庭廡而巖之唇吻必垂涎及頤
頰若喻膏血之氣者久之方復常態有司俟其復常乃
引罪人而退蓋妖蜃毒龍之類非可待以人倫也巖暴

政之外惟以治宮殿爲務故作昭陽諸殿秀華諸宮皆
極瓌麗昭陽殿以金爲仰陽銀爲地面簷楹榱桷亦皆
飾之以銀殿下設水渠浸以眞珠又琢水晶琥珀爲日
月列於東西二樓之上巖親書其榜已上見進士王宏昭陽殿賦詢之越人皆非虛也其餘宮室殿宇悉同之每引嶺行商以示奢廷博案句似誤一本云每引嶺外行商以示奢侈亦由之而稱強盛涼臺之寶不
亦疎乎巖末年乃天福壬寅歲是歲夏四月避暑於甘
泉宮時長星見乃宋孝武萬歲之說未幾而殂焉巖既
卒子玠嗣位是爲殤帝昏暴益甚爲長夜之飲二年春

三月其弟晟因人之情乃使壯士夜以角觝進因而弒

之於長春宮玠卒晟乃襲偽位改元應乾

晟本二名上一字犯宣祖

諱去

之江南李氏因湖湘之勢遂以兵侵其境為晟所敗

獲其敗卒盡滅去一臂以歸之江南由是絕南顧之意

晟僻在一隅自為強大以中國帝王為洛州刺史每宴

會則獨處殿庭之間侍宴臣僚皆結綵亭列坐於殿之

兩隅宴酣則有司以檻獸而進兩傍翼以戈戟晟親持

弓矢下殿有司引獸檻而前逡巡獸出移庭而上晟引

弓射之兩旁戈戟競進獸乃斃其為樂皆類此耳晟晚

年猜忌功臣宗室誅戮相繼陳道庠者嘗為角觝以弒

殤玠者晟既忌之欲其自退乃賜之漢紀一部庠受賜

莫知其由因以問內侍鄧申申曰殺韓信醢彭越之謂

也庠因稱疾晟聞之反怒申以漏洩乃兼誅之晟每誅

親族其子皆鴆死女有色遂置嬪御之列晟之所為雖

蠻夷不足以論理而人倫之內實所忍聞焉張晟之長

子也年十七襲偽位改元大寶委政內官龔澄樞及才

人盧瓊仙又引巫樊胡子自言玉皇大帝附其身服遠

游冠妖言以陳禍福張於內殿設帷幄陳物玩以奉之

胡子爲大帝言謂鍠曰盧瓊仙等皆我命之以爲爾輔
爾當盡心委之無得妄有疑慮鍠再拜而聽由是內外
淫亂鍠踵父之奢縱立萬政殿飾一柱凡川銀三千兩
又以銀爲殿衣閒以雲母無名之費日有萬千末年野
草生於宮殿御井石自行百餘步狐鳴鬼哭妖怪日作
至於亾國焉鍠旣爲天兵所敗其下乃燔爇府庫寶貨
之外其眞珠至美者凡四十有六甕焉及至京師鍠乃
自結眞珠龍鳳鞍靶以獻太祖謂羣臣曰聞鍠所貢悉
皆手製其所善止如此不亾何待邪鍠在南越僞封衛

王及歸朝封恩赦侯旋改彭城郡公又進封衛國公及
薨追封南越王焉吁彭城氏非積善之家以淫刑爲政
加之內理無復禮度雖滅亾也而猶獲其令終者不亦
幸乎

閩忠懿王諱審知光州固始人也長兄潮次兄圭及審
知軍中號爲三龍皆以唐末起兵爲黃巢部伍巢敗乃
領其衆入泉州旋自泉州復入福州初碎石僧爲讖辭
曰巖高潮水沒潮退矢口出若言潮破福州陳巖而審
知終嗣其地也潮嘗使日者視已兄弟曰一个勝一个

五國古事下
審知方侍其側沾汗而退審知性儉約嘗衣紬一日袴
敗乃取酒庫醲袋而補之又嘗使南方回者以玻璃瓶
獻之審知看玩久之因擲於地謂左右曰好奇尙異乃
奢侈之木今沮之貴後代無爲漸也或云延鈞僭立以
御服被於審知之廟審知寓夢於延鈞責之不肖服延
翰審知子也襲父位踰年而終翰妻博陵氏之女性悍
妒而殘忍嘗以練縛姬侍而鞭之練染血赤乃止又置
木掌摑人一旦盛暑天無纖雲而霆電擊博陵斃於中
庭或曰忠懿暴終博陵之鳩故也延鈞審知次子延翰

殂遂襲其位無奇能政其初數年頗亦善守比及季運
乃僭稱大號號國曰大閩改元龍啓卽位日旣被袞冕
遂恍惚不能自知久之方蘇乃心許飯僧三百萬繕經
三百藏尋而稍安乃訖其禮復於諸寺賽所許願文疏
中明述其事聞者哂之曰大閩之應天順人有如此者
延鈞旣僭位改名鱗鱗將死有赤虹入其室飲以金盆
水吸之俄盡又芝生殿門俄而遇弑鱗死金陵以閩人
語訛戲之因送綾遂以爲花絹意以鱗爲綾避其諱也
鈞初議僭號不欲盡兼尊欲爲閩國皇僞翰林學士周

五國古事一
維岳進曰陛下欲稱國皇臣亦止稱翰林學又爲赦書
有日行五十里之說聞者哂之延稟者審知之養子眇
一目人亦謂之獨眼龍延鈞兄也翰旣死稟自泉州
率兵而至因延鈞爲主自還泉州將行謂鈞曰善守之
無煩老兄再至鈞憾其言後因詐疾以死訃於稟稟復
來遂以兵迎於南臺江鑿之舟中取其首至而責之曰
果煩老兄再至矣因梟之無諸市稟之子繼昇繼倫皆
奔浙中初延稟自光山赴建州人一山寺劫掠有僧但
誦法華經見稟不起稟怒殺之後常見僧現其形細視

之乃延鈞耳稟由是心疑至是果驗其冤祖本名繼鵬
僞封福王卽鈞之長子也鈞旣爲皇城使李倣所弑而
立祖祖遂改元通文性狂狷嘗欲練兵襲金陵乃於殿
庭設大砂羅於射棚示衆曰一發中之當平定江南射
棚去庭堦纔五六十步砂羅復甚大果一發中之其下
皆賀曰此一箭定天下矣遂發兵至於境上金陵聞之
無所詭責但曰愍其有此大志耳祖立而忠懿王之勳
舊悉屏去之衙兵先號威武軍者亦棄不用威武軍忠
懿王之親兵也以軍額而名之因召市井屠沽輩別立

宸衛軍名衣以羅襦銀帶飲食之器悉皆中金所給俸
賜復數倍於威武武頗怒一日潛匣劍遂取延義於
私第而立之延義審知第二十八子也先時得罪於和
昶囚之私第有庭石一根一日有白煙一穗起於石上
久之方散延義懼乃密召道士陳守元卽偽號陳天師
者也使禳剋之守元曰未必不爲嘉兆也是夕兵至其
門而迎之延義謂昶使人收之乃逃於廁中久方出延
義卽位改元永隆移書於鄰國曰六軍踴躍於門前羣
臣懽呼於日下是也延義在位爲長夜之飲鍛銀葉爲

酒杯以賜飲羣下銀葉旣柔弱因目之爲冬瓜片又名
之曰醉如泥酒旣盈卽不許復置他所惟飲盡乃可舍
自宗室洎宰臣而下多以拒命見誅嘗一夕醉甚命其
僞宰相李準棄市而準方大醉臥於市中唯呼其婢春
鶯而已行刑者不敢殺因致之非所明日延義視朝使
召準左右以夜來之命對之延義都不能知乃急召仍
復其位是日又宴翰林學士周維岳復被怒下獄獄吏
拂榻而迎之曰尙書無苦憂昨夕相公方宿此今亦無
恙旣醒果然又嘗會飲極酣 侍者皆退惟義與維

岳在坐因顧左右曰維岳身軀甚小而能飲如許酒左右對曰臣聞酒有別腸非可以肌體而論之延義欣然曰果有別腸即使拽維岳下殿將取別腸視之左右善對曰今侍奉飲樂唯維岳最有殊量取其別腸是無可陪奉者延義然之遂獲免其荒淫暴虐率皆此類延義末年爲僞客省使朱文進所弑遇弑之日延義將與其僞妃上官出上官之私第

延博案別本出字增氏字下增幸字

首蓼數

花自九龍殿褰簾而出三爲簾所拂花墜於地延義復整花上馬馬驚躍不能上者數四旣而不踰數步爲衛

士以金鎗而害之閩人每出衙仗必木爲刃以四金鎗衛於馬前至是乃以此爲亂王氏遂滅忠懿嘗問懿山僧國祚脩短僧曰大王騎馬來騎馬去忠懿以丙午得閩至開運丙午歲而國亡其言驗矣延政延義弟也延義卽位乃請以建州爲威武軍延義不許因授延義爲建州鎮安軍節度使延政乃自更爲鎮武後復僭號稱大商皇帝改元天德以其廳爲太和殿雖服赭袍而早晚參衙及見四方使介如藩郡之禮延義遇害閩人有迎延政於建州者會延政爲淮兵所攻不能下使其子

繼雄至復爲文進拒而殺之延政終歸於江南封自在
王尋改光山王終鄱陽焉延彬圭之子忠懿之猶子也
圭死襲其父封於泉州頗與延鈞篤兄弟之分性多藝
而奢縱日服一巾櫛日易一汗衫既醉必以龍腦數器
覆之無病則亭午方起能爲詩亦好說佛理詩人禪客
謁見多爲所沮宅中聲妓皆北人將求妙必圖已形而
書其歌詩於圖側曰才如此貌如此以是冀其見慕初
圭領兵至泉州舍於開 寺始生延彬於寺之 堂既
生而有白雀一棲於堂中迄延彬之終方失其所在凡

三十年仍歲豐稔每發蠻船無失墜者人因謂之招寶
侍郎進士徐寅嘗爲人生幾何賦云任是三皇五帝不
死何歸後因脩合求藥於延彬延彬卽書其賦辭於紙
尾而報之其風味又類此也朝廷授延彬雲州節度使
及卒復贈侍中葬雲臺山迄今閩人謂之雲臺侍中其
詩有尤者曰兩衙前後訟堂清軟錦披袍擁鼻行雨後
綠苔侵履跡春深紅杏鑠鶯聲因攜久醞松醪酒自煮
新抽竹筍羹也解爲詩也爲政儂家何似謝宣城人多
誦之

偽朱文進者王氏時為客省使既弒其君延義乃稱藩於朝廷行

天福年號朝廷授文進福州節度

使同中書門下平章事封閩國王泉州指揮使婁從效殺文進所署刺史黃紹頗以王繼勳代之遙應建州文進發兵攻之為泉人所敗連重遇乃殺文進傳首建州以從子繼昌來守福州為淮兵所阻不得進指揮使李孺贊乃推僧卓儼明為主卓儼明本神光寺僧住上方達將自立

李孺贊本名達。延博案孺贊本名宏達賜名宏義今云本名達及後云賜名義者皆避宋宣祖諱如前偽漢第三主晟之例也攷十國春秋又作仁達蓋亦宋時例改如表忠觀碑稱忠獻為仁佐是

也并附識之。又案玉壺清話以儼明為嵩明及稱李義為內臣未詳孰是 懼人情不附乃

假立之示衆曰儼明在神光寺上方嘗睡菴中有赤蛇出入其鼻中此異人也當迎立之衆從其議未幾殺之遂自立既自立乃表朝廷授檢校太尉同平章事充福建節度使知閩國事復求爵於朝廷不允遂歸江南編入屬籍賜名義預其偽皇子之列既而召之使人覲孺贊復不聽命遂為江南所攻告急於浙兵救之圍解乃覲於浙改孺贊未幾還本任復謀叛為浙兵所戮其弟孺賓亦誅焉婁從效泉州桃林人也父諱璋初與董思

安張漢思陳洪進等俱為本州偏將及朱文進篡滅王氏以其將黃紹頗守泉州從効等因殺紹頗而立王繼勳以應建州文進舉兵攻之不克及江南剋建州從効首請 江南之命累授從効至檢校太尉兼中書令泉州清源軍節度使鄂國公十數年閒頗亦強盛建隆壬戌歲從効自五月發疽至於七月不愈中外音問不通羣校頗有異議一日先鋒指揮使王亡名請入省疾而從効危篤乃以關路之廷博案宋史但云疽發背死從効死衆立張漢思為帥以洪進副之使王亡名出守漳州不聽又

遣戍蒲田亦不聽因使衆擊之垂困送同安縣羈縻之未幾而斃初從効有泉南之地洪進為其大將與張漢思同列從効死漢思有其郡且請節制於江南以洪進為節度副使而頗忌洪進一日設筵將害洪進俄而地震漢思惶惑洪進遂起出他日洪進率子弟徑入衙署取其符印而廢之送家莊洪進因請命於朝廷授以平海軍節度使太宗卽位乃脩朝覲改授徐州節鎮兼使相封岐國公終贈中書令諡曰忠順

五國故事卷下

陸敕先借鈔訖

錢遵皇錄過

壬寅仲春初九日閱于劍光閣 唐卿識

趙前之借錄

右五國故事上下卷分紀楊行密李昇王建孟知祥
 劉巖王審知六國事而未附以朱文進諸人其曰五
 國者合前後蜀為一國也鄭氏通志列之霸史不著
 撰人姓氏按卷中以畱從效作婁從效徵之楓窗小
 牘云錢武肅辟羅昭諫書曰仲宣遠託婁荊州以婁
 代劉避武肅嫌名也則此書蓋吳越閒人所著故於
 諸國皆書姓而漢獨稱彭城氏與林垌等撰吳越備
 史同例又其証也向無刊本傳鈔多謬如下卷漢先
 主名巖後名龔注云後又名龔傳本脫去龔字又誤

注文後字爲俊康熙閒吾宗志伊太史撰十國春秋
据其本遂云一名俊復注云無攷不知爲後字之訛
也又任臣採錄此書最詳獨遺徐知誥取知容綃巾
及王延義褰幃整花二事細案之亦他本所佚也此
冊爲明代劍光閣舊鈔較他本爲勝江南藏書家多
從借錄題名具有足徵者鮑君以文喜刊異書以
家所藏爲未善請以付梓固予素志也喜綴數語輟
而贈之

乾隆癸巳仲春三日仁和吳長元書於他北草堂

